




7104-5



永樂大典卷之七千一百四

十八陽

唐

宣宗

新唐書本紀宣宗元聖至明成武獻文睿智章仁神聰懿道大孝皇帝諱忱憲宗第十三子也母曰孝明皇太后鄭氏始封光

王性嚴重寡言宮中或以為不慧會昌六年武宗疾大漸左神策軍護軍中尉馬元贄立光王為皇太叔三月甲子即皇帝位于柩前四月乙亥始聽政尊母為皇太后丙子李德裕罷辛卯李讓夷為司空五月乙巳大赦翰林學士承旨兵部侍郎白敏中同中書門下平章事辛酉封子溫為鄆王漾雍王涇雅王滋夔王沂慶王七月李讓夷罷八月辛未大行宮火壬申葬至道昭肅孝皇帝于端陵九月鄭肅罷兵部侍郎判度支盧商為中書侍郎同中書門下平章事雲南蠻寇安南經略使裴元裕敗之十二月戊辰朔日有食之大中元年正月壬子朝獻于太清宮癸丑朝享于太廟甲寅有事于南郊大赦改元復左降官死者官爵賜文武官階勳父老帛文宣王後及二王後三恪予一子官二月癸未以旱避正殿減膳理京師

囚罷太常教坊習樂。損百官食。出宮女五百人。放五坊鷹犬。停飛龍馬粟。三月。盧商罷。刑部尚書判度支。崔元式為門下侍郎。翰林學士承旨。戶部侍郎。韋琮為中書侍郎。同中書門下平章事。閏月。大復佛寺。四月。己酉。皇太后崩。五月。張仲武及奚北部落戰。敗之。吐蕃回鶻寇河西。河東節度使王宰伐之。八月。丙申。李回罷。庚子。葬真獻皇太后于光陵。十二月。戊午。貶太子少保李德裕為潮州司馬。二年。正月。甲子。群臣上尊號曰聖敬文思和武光孝皇帝。大赦。宗子房未仕者。予一人出身。賜文武官階勳爵。三月。封子澤為濮王。五月。己未。朔。日有食之。崔元式罷。兵部侍郎判度支。周墀。刑部侍郎。諸道鹽鐵轉運使。馬植。同中書門下平章事。己卯。太皇太后崩。七月。己巳。續圖功臣于凌煙閣。十一月。壬子。葬懿安太皇太后于景陵。貶韋琮為太子賓客。分司東都。三年。二月。吐蕃以秦原安樂三州。石門驛。藏木峽。制勝六盤石峽。蕭七關。歸于有司。三月。詔待制官與刑法官諫官。次對。馬植罷。是春。隕霜殺桑。四月。乙酉。周墀罷。御史大夫崔鉉為中書侍郎。兵部侍郎。判戶部事。魏扶。同中書門下平章事。癸巳。幽州盧龍軍節度使張仲武卒。其子直方自稱留後。五月。武寧軍亂。逐其節度使李廓。十月。辛巳。京師地震。是月。振武及天德靈武鹽夏二州地震。吐蕃以維州歸。

于有司。十一月。己卯。封弟揚為彭王。十二月。吐蕃以扶州歸于有司。四年。正月。庚辰。大赦。四月。壬申。以雨霖。詔京師關輔理囚。蠲度支鹽鐵。戶部逋負。六月。戊申。魏扶薨。戶部尚書判度支。崔龜從。同中書門下平章事。八月。幽州盧龍軍亂。逐其節度使張直方。衙將張允。仲自稱留後。十月。辛未。翰林學士承旨。兵部侍郎。令狐綯。同中書門下平章事。十一月。党項羌寇邠寧。十二月。鳳翔節度使李安業。河東節度使李拭。為招討党項使。五年。三月。白敏中為司空。招討南山平夏党項。行營兵馬都統。四月。赦平夏党項羌。辛未。給復靈鹽夏三州。邠寧邠坊等道三歲。六月。封子潤為鄂王。八月。乙巳。赦南山党項羌。十月。沙州人張義潮。以瓜沙伊肅鄯甘河西蘭岷廓十一州。歸于有司。白敏中罷。戊辰。戶部侍郎。判戶部。魏謩。同中書門下平章事。十一月。崔龜從罷。十二月。盜斫景陵門戟。是歲。湖南饑。六年。三月。有彗星出于莆參。七月。雍王渼蕘。八月。禮部尚書。諸道鹽鐵轉運使。裴休。同中書門下平章事。九月。獠寇昌資二州。十一月。封弟惲為王。是歲。淮南饑。七年。正月。丙午。朝獻于太清宮。丁未。朝享于太廟。戊申。有事于南郊。大赦。八年。正月。丙戌。朔。日有食之。三月。以旱理囚。九月。封子洽為懷王。丙昭王。汶康王。九年。正月。甲申。成德軍節度使。王元逵卒。其子。

紹鼎自稱留後。閏四月辛丑。禁嶺外民鬻男女者。七月以旱遣使巡撫淮南。減上供饋運。蠲通租。發粟賑民。丙辰。崔鉉罷。庚申。罷淮南宣歙浙西冬至元日常貢。以代下戶租稅。是月浙江東道軍亂。逐其觀察使李訥。十年正月丁巳。御史大夫鄭朗為工部尚書。同中書門下平章事。九月封子灌為衛王。十月戊子。裴休罷。十二月壬辰。戶部侍郎判戶部崔慎由為工部尚書。同中書門下平章事。十一年二月辛巳。魏謩罷。五月。容管軍亂。逐其經略使王球。七月庚子。兵部侍郎判度支蕭鄴。同中書門下平章事。成德軍節度副大使王紹鼎卒。其弟紹懿自稱留後。八月封子濉為廣王。九月乙未。有彗星出于房。十月壬申。鄭朗罷。十二年正月戊戌。戶部侍郎判度支劉瑒。同中書門下平章事。二月。廢穆宗忌日。停光陵朝拜。及守陵官人。壬申。崔慎由罷。閏月自十月不雨。至于是月雨。三月。鹽州監軍使楊玄价。殺其刺史劉皋。四月庚子。嶺南軍亂。逐其節度使楊發。戊申。兵部侍郎諸道鹽鐵轉運使夏侯孜。同中書門下平章事。五月丙寅。劉瑒薨。庚辰。湖南軍亂。逐其觀察使韓琮。六月丙申。江西都將毛鶴。逐其觀察使鄭憲。辛亥。南蠻寇邊。七月。容州將來正反。伏誅。八月。宣歙將康全泰。逐其觀察使鄭薰。淮南節度使崔鉉。廉宣歙池觀察處置使。以討之。丁巳。太原地

震。十月。康全泰伏誅。十二月。毛鶴伏誅。甲寅。兵部侍郎判戶部蔣伸。同中書門下平章事。十三年正月戊午。大赦。蠲度支戶部逋負。放宮人。八月壬辰。左神策軍護軍中尉王宗實。立鄆王溫為皇太子。權句當軍國政事。癸巳。皇帝崩于咸寧殿。年五十。諡曰聖武。獻文孝皇帝。咸通十三年。加諡元聖。至明成武。獻文睿智章仁神聰懿道大孝皇帝。贊曰。春秋之法。君弑而賊不討。則深責其國。以為無臣子也。憲宗之弑。歷三世而賊猶在。至於文宗。不能明弘志等罪惡。以正國之典刑。僅能殺之而已。是可歎也。穆敬昏童失德。以其在位不久。故天下未至於敗亂。而敬宗卒及其身。是豈有討賊之志哉。文宗恭儉儒雅。出於天性。嘗讀太宗政要。慨然慕之。及即位。銳意於治。每延英對宰臣。率漏下十一刻。唐制。天子以隻日視朝。乃命輟朝。放朝皆用雙日。凡除吏。必召見訪問。觀察其能否。故大和之初。政事脩飭。號為清明。然其仁而少斷。承父兄之弊。宦官撓權。制之不得其術。故其終困以此。甘露之事。禍及忠良。不勝冤憤。飲恨而已。由是言之。其能殺弘志。亦足伸其志也。昔武丁得一傳說。為商高宗。武宗用一李德裕。遂成其功烈。然其奮然除去浮圖之法。甚銳。而躬受道家之錄。服藥以求長年。以此見其非明智之不惑者。特好惡有不同爾。宣宗精於聽斷。而以察為明。

無復仁恩之意。嗚呼！自是而後唐衰矣。董衝釋音。莫胡切。訥。而銳切。瑒。時克切。舊唐書本紀。宣宗聖武獻文孝皇帝諱忱。憲宗第十三子。母曰孝明皇后鄭氏。元和五年六月二十二日。生於大明宮。長慶元年三月。封光王。名怡。會昌六年三月一日。武宗疾篤。遺詔立為皇太叔。權勾當軍國政事。翌日。柩前即帝位。改今名。時年三十七。帝外晦而內朗。嚴重寡言。視瞻特異。幼時宮中以為不惠。十餘歲時。遇重疾。沈緘。忽有光輝燭身。蹶然而興。正身拱揖如對。臣寮乳媪以為心疾。穆宗視之。撫其背曰。此吾家英物。非心憊也。賜以玉如意。御馬金帶。常夢乘龍昇天。言之於鄭太后。乃曰。此不宜人知。母幸勿復言。歷大和會昌朝。愈事鞫晦。群居游處。未嘗有言。文宗武宗幸十六宅宴集。強誘其言。以為戲劇。謂之光叔。武宗氣豪。尤不為禮。及監國之日。哀毀滿容。接待群寮。次斷庶務。人方見其隱德焉。四月辛未。釋服尊母鄭氏曰皇太后。以兵部侍郎翰林學士承旨白敏中守本官。同中書門下平章事。以特進守太尉門下侍郎同平章事。上柱國衛國公。食邑二千戶。李德裕檢校太尉同平章事。江陵尹荆南節度使。以中散大夫大理卿馬植為金紫光祿大夫刑部侍郎。充諸道鹽鐵轉運使。以成德軍節度使王元逵檢校太保。山南西道節度使王起。檢校司空。魏博節度

使何弘敬。淮南節度使李紳。並檢校司徒。劍南西川節度使崔郾。檢校尚書右僕射。同中書門下平章事。並如故。東都留守李石奏。修奉太廟畢。所迎奉太微宮神主。祔廟訖。東都太廟者。本武后家廟。神龍中。中宗反正。廢武氏廟主。立太祖已下神主。祔之。安祿山陷洛陽。以廟為馬廐。棄其神主。而協律郎嚴郢收而藏之。史思明再陷洛陽。尋又散失。賊平。東京留守盧正已。又募得之。廟已焚毀。乃寄主於太微宮。大曆十四年。留守路嗣恭奏。重脩太廟。以迎神主。詔百官參議。紛然不定。禮儀使顏真卿。堅請歸祔。不從。會昌五年。留守李石。因太微宮正殿圯。侈以廢弘敬寺為太廟。迎神主。祔之。又下百寮商議。皆言准故事。無兩都俱置廟之禮。唯禮部侍郎陳商議云。周之文武。有鎬洛二廟。今兩都異廟。可也。然不宜置主於廟。主宜依禮。瘞於廟之北墉下。事未行。而武宗崩。宣宗即位。因詔有司。迎太微宮寓主。祔廢寺之新廟。而知禮者非之。制皇長男溫。可封鄆王。第二男涇。可封雅王。第三男滋。可封蘄王。第四男沂。可封慶王。五月。左右街功德使奏。准今月五日。赦書節文。上都兩街舊留四寺外。更添置八所。兩所依舊名。興唐寺。保壽寺。六所請改舊名。寶應寺。改為資聖寺。青龍寺。改為護國寺。菩提寺。改為保唐寺。清禪寺。改為安國寺。法雲尼寺。改為唐安寺。崇敬尼寺。

改為唐昌寺。右街添置八所。西明寺改為福壽寺。莊嚴寺改為聖壽寺。舊留寺二所。舊名千福寺。改為興元寺。化度寺改為崇福寺。永泰寺改為萬壽寺。溫國寺改為崇聖寺。經行寺改為龍興寺。奉恩寺改為興福寺。勅旨依奏。誅道士劉玄靜等十二人。以其說惑武宗。排毀釋氏故也。今月五日。赦書節文。吏部三銓選士。祇憑資考。多匪實才。許觀察使刺史。史有奇才。異政之士。間薦試用。又觀察使刺史。文代之時。明書所交戶口。如能增添。至千戶。即與超遷。如逃亡至七百戶。罷役三年。內不得任使。又徒流人在。天德振武者。官中量借糧種。俾令耕田。以為業。以劔南東川節度使檢校禮部尚書盧商。為兵部侍郎同平章事。六月。以戶部侍郎充諸道鹽鐵轉運使。馬植。本官同平章事。七月。以兵部尚書李讓夷。為劔南東川節度使。十月。勅太廟祫享。合以功臣配。其憲宗廟。以裴度。杜黃裳。李愬。高崇文等配饗。以荆南節度使李德裕。為東都留守。十一月。有司饗太廟。其穆宗室。文曰。皇兄太常博士閔慶之奏。夫禮有尊尊。而不叙親親。祝文稱謂未當。請改為嗣皇帝。從之。京兆府奏。京百司職田斛斛。請准會昌三年例。許人戶自送納京司。所冀州縣無能欺隱。從之。以江西觀察使周墀。為義成軍節度。鄭滑觀察等使。十二月。刑部尚書判度支崔元式奏。准七月二日勅。

綾紗絹等次弱足段。並令禁斷。不得織造。臣欲與鹽鐵戶部三司同條。流先勘左藏庫。今分析出次弱足段。州府即牒本道。差官搜索狹小機杼。令焚毀。其已納到次弱足段。具數以聞。上從之。大中元年春正月戊戌朔。官苑使奏。皇帝致齋行事。內諸宮苑門共九十四所。並令鎖閉。鑰匙進內。候車駕還宮。則請領。從之。戊申。皇帝有事於郊廟。禮畢。御丹鳳門。大赦。改元。制條曰。古者郎官出宰。卿相治郡。所以重親人之官。急為政之本。自澆風文扇。此道稍消。頡頏清途。便臻顯貴。治人之術。未嘗經心。欲使究百姓艱危。通天下利病。不可得也。為政之始。思厚儒風。軒墀近臣。蓋備顧問。如其不知人疾苦。何以膺朕眷求。今後諫議大夫。給事中。中書舍人。未曾任。刺史縣令。或在任有敗。累者。宰臣不得擬議。守宰親人。職當撫字。三載考績。著在格言。真元年中。屢下明詔。縣令五考。方得改移。近者因循。都不遵守。諸州或得五考。畿府罕及二年。以此字人。若為成政。道途郡吏。有迎送之勞。鄉里庶民。無蘇息之望。自今。須滿三十六箇月。永為常式。二月丁卯。制。憲宗第十七子愬。封彭王。第十八子曄。為王。第五子澤。為濮王。第六子潤。為鄂王。勅修百福殿。以檢校太尉東都留守李德裕。為太子少保。分司東都。以給事中鄭亞。為桂州刺史。御史中丞桂管防禦觀察等使。二月。

丁酉禮部侍郎魏扶奏。臣今年所放進士二十三人。其封彥卿。崔瑒。鄭延休等三人。實有詞藝。為時所稱。皆以父兄見居重位。不敢令中選。詔令翰林學士承旨。戶部侍郎韋琮重考覆。勅曰。彥卿等所試文字。並合度程。可放及第。有司考試。祇在至公。如涉請托。自有朝典。今後但依常例放榜。不得別有奏聞。帝雅好儒士。留心貢舉。有時徵行人間。採聽輿論。以觀選士之得失。每山池曲宴。學士詩什屬和。公卿出鎮。亦賦詩餞行。凡對臣寮。肅然拱揖。鮮有輕揚之言。大臣或獻章疏。即燒香盥手而覽之。當時以大中之政。有貞觀之風焉。又勅自今進士放榜後。杏園任依舊宴集。有司不得禁制。武宗好巡遊。故曲江亭禁人宴聚。故也。閏三月初。會昌季年。併省寺宇。雖云異方之教。無損為理之源。中國之人。久行其道。釐革過當。事體未弘。其靈山勝境。天下州府。應會昌五年四月所廢寺宇。如有宿舊名僧。復能修創。一任住持。所由不得禁止。四月。積慶太后蕭氏崩。謚曰貞獻。文宗母也。六月。以義成軍節度使周墀為兵部侍郎。判度支。策點戛斯王子為英武。誠明可汗。命鴻臚卿李業入蕃策拜。以金紫光祿大夫守太子少保。分司東都。上柱國奇章郡開國公。食邑二千戶。牛僧孺守太子少師。銀青光祿大夫。行太子賓客。上柱國隴西郡開國公。食邑二千戶。李彥佐為太

子太保。並依前分司。以左諫議大夫庾簡休為虢州刺史。以正議大夫行尚書考功郎中。知制誥。上柱國崔瑒為中書舍人。以中散大夫前湖州刺史。彭陽縣開國男。食邑三百戶。令狐綯。行尚書考功郎中。知制誥。秋七月。制以正議大夫尚書戶部侍郎。知制誥。翰林學士承旨。柱國。賜紫金魚袋。韋琮。以本官同中書門下平章事。以太子少保。分司東都。衛國公。李德裕為人。所訟。貶潮州司馬。負外置。八月。工部尚書中書侍郎。平章事。盧商。出為鄂岳觀察使。神策軍奏修百福殿。成。名其殿曰雍和殿。樓曰親親樓。凡廊舍屋宇七百間。以會諸王子孫。九月。前永寧縣尉吳汝訥。詣闕稱冤。言弟湘。會昌四年。任揚州江都縣尉。被節度使李紳。誣奏湘。贓罪。宰相李德裕。曲情附紳。斷臣弟湘致死。詔下御史臺按鞫。二年。春正月。壬戌。宰臣率文武百寮。上徽號曰聖敬文思和武光孝皇帝。御宣政殿。受策訖。宣德音。神策軍修左銀臺門樓屋宇。及南面城牆。至睿武樓。二月。制劍南西川節度光祿大夫。檢校吏部尚書。同平章事。成都尹。上柱國。隴西郡開國公。食邑二千戶。李回。責授湖南觀察使。桂管防禦觀察使。桂州刺史。御史中丞。鄭亞。責授循州刺史。前淮南觀察判官。魏鉶。貶吉州司戶。陸渾縣令。元壽。貶韶州司戶。殿中侍御史。蔡京。貶澧州司馬。御史臺奏。據三司推勘。吳

湘獄謹具逐人罪狀如後。揚州都虞候盧行立。劉群。於會昌二年五月十四日。於阿顏家喫酒。與阿顏母阿焦同坐。群自擬收阿顏為妻。妄稱監軍使。處分要阿顏進奉。不得嫁人。兼擅令人監守。其阿焦遂與江都縣尉吳湘密約。嫁阿顏與湘。劉群與押軍牙官李克勳。即時遮攔不得。乃令江都百姓論湘取受。節度使李紳。追湘下獄。計贓處死。具獄奏聞。朝廷疑其冤。差御史崔元藻。往揚州按問。據湘雖有取受。罪不至死。李德裕黨附李紳。乃貶元藻嶺南。取淮南元申文案。斷湘處死。今據三司使追崔元藻。及淮南元推判官魏錮。并關連人款狀。淮南都虞候劉群。元推判官魏錮。典孫貞高利。錢倚。黃嵩。江都縣典沈頌。陳宰。節度押牙白涉。鎮遏使傅義。左都虞候盧行立。天長縣令張弘思。典張洙。任清。陳迴。右廂子巡李行璠。典金弘舉。送吳湘妻女至澧州。取受錢物人潘宰。前揚州府錄事參軍李公佐。元推官元壽。吳拱。翁恭。太子少保分司李德裕。西川節度使李回。桂管觀察使鄭亞等。伏候勅旨。其月勅李回。鄭亞。元壽。魏錮。已從別勅處分。李紳起此冤訴。本由不直。今既身歿。無以加刑。粗塞衆情。量行削奪。宜追奪三任官告。送刑部注毀。其子孫。稽于經義。罰不及嗣。並釋放。李德裕。先朝委以重權。不務絕其黨庇。致使冤苦。直到于今。職爾之由。能無恨嘆。昨以李

威所訴。已經遠貶。俯全事體。特為從寬。宜准去年勅命處分。張弘思。李公佐。卑吏守官。制不由己。不能守正。曲附權臣。各削兩任官。崔元藻。曾受無辜之貶。合從洗雪之條。委中書門下商量處分。李恪。詳驗款狀。嘉害最深。以其多時。須議減等。委京兆府決脊杖十五。配流天德。李克勳。欲收阿顏。決脊杖二十。配流硤州。劉群。據其款狀。合議痛刑。曾劾職官。不欲決脊杖。配流岳州。其盧行立。及諸典吏。委三司使量罪科放訖。聞奏。三月己酉。兵部侍郎判度支周墀。本官平章事。以禮部尚書鹽鐵轉運使馬植。本官同平章事。日本國王子入朝。貢方物。王子善恭。帝令待詔。顧師言與之對手。五月己未。日有蝕之。六月己丑。太皇太后郭氏崩。謚曰懿安。憲宗妃。穆宗之母也。戶部侍郎兼御史大夫判度支崔龜從。奏應諸司場院官請却官本錢。後或有欺隱。欠負徵理。須足。不得苟從。恩蕩以求放免。今後凡隱盜欠負。請如官典犯贓例處分。縱逢恩赦。不在免限。從之。七月戊午。以前山南西道節度使高元裕。為吏部尚書。八月戊子。朝散大夫中書舍人充翰林學士上柱國平陰縣開國男食實封三百戶。賜紫金魚袋。畢誠。為刑部侍郎。九月勅。比有無良之人。於街市投匿名文書。及於箭上。或旗幡上。縱為奸言。以亂國法。此後所由。切加捉搦。如獲此色。便仰焚燼。不

得。上。間。十。一。月。兵。部。侍。郎。判。戶。部。事。魏。扶。奏。天。下。州。府。錢。物。斛。斗。文。簿。並。委。錄。事。叅。軍。專。判。仍。與。長。吏。通。判。至。交。代。時。具。數。申。奏。如。無。懸。欠。量。與。減。選。注。擬。勅。路。隨。等。所。修。憲。宗。實。錄。舊。本。却。仰。施。行。其。會。昌。新。修。者。仰。並。進。納。如。有。抄。錄。得。勅。到。並。納。史。館。不。得。輒。留。委。州。府。嚴。加。搜。捕。以。戶。部。侍。郎。判。度。支。崔。龜。從。本。官。同。平。章。事。銀。青。光。祿。大。夫。門。下。侍。郎。兼。禮。部。尚。書。同。平。章。事。韋。琮。為。太。子。詹。事。分。司。東。都。三。年。春。正。月。丙。寅。涇。原。節。度。使。康。季。榮。奏。吐。蕃。宰。相。論。恐。熱。以。秦。原。安。樂。三。州。及。石。門。等。七。關。之。兵。民。歸。國。詔。太。僕。卿。陸。耽。往。喻。旨。仍。令。靈。武。節。度。使。朱。叔。明。邠。寧。節。度。使。張。景。緒。各。出。本。道。兵。馬。應。接。其。來。以。太。常。卿。封。敖。檢。校。兵。部。尚。書。為。興。元。尹。山。南。西。道。節。度。使。三。月。乙。卯。勅。待。詔。官。宜。令。與。刑。法。官。諫。官。次。對。銀。青。光。祿。大。夫。中。書。侍。郎。同。平。章。事。監。修。國。史。上。柱。國。汝。南。縣。開。國。子。食。邑。五。百。戶。周。燁。檢。校。刑。部。尚。書。梓。州。刺。史。充。劔。南。東。川。節。度。使。四。月。以。正。議。大。夫。守。中。書。侍。郎。同。平。章。事。集。賢。殿。大。學。士。賜。紫。金。魚。袋。馬。植。為。太。子。賓。客。分。司。東。都。以。正。議。大。夫。守。御。史。大。夫。上。柱。國。博。陵。縣。開。國。子。食。邑。五。百。戶。賜。紫。金。魚。袋。崔。鉉。可。中。書。侍。郎。平。章。事。正。議。大。夫。行。兵。部。侍。郎。判。戶。部。事。上。柱。國。鉅。鹿。縣。開。國。男。食。邑。五。百。戶。賜。紫。金。魚。袋。魏。扶。可。本。官。同。平。章。事。五。月。幽。州。

節。度。使。檢。校。司。徒。平。章。事。張。仲。武。卒。三。軍。以。其。子。直。方。知。留。後。事。六。月。癸。未。五。色。雲。見。於。京。師。勅。先。經。流。貶。罪。人。不。幸。歿。於。貶。所。有。情。非。惡。逆。任。經。刑。部。陳。牒。許。令。歸。葬。絕。遠。之。處。仍。量。事。官。給。棺。槨。康。季。榮。奏。收。復。原。州。及。石。門。驛。葺。木。峽。制。勝。六。盤。石。峽。等。六。關。訖。邠。寧。張。君。緒。奏。今。月。十。三。日。收。復。蕭。關。御。史。臺。奏。義。成。軍。節。度。使。常。讓。於。懷。真。坊。侵。街。造。屋。九。間。已。令。毀。折。訖。勅。於。蕭。關。置。武。州。改。樂。安。為。威。州。七。月。三。州。七。關。軍。人。百。姓。皆。河。隴。遺。黎。數。千。人。見。于。闕。下。上。御。延。喜。門。撫。慰。令。其。解。辦。賜。之。冠。帶。共。賜。絹。十。五。萬。匹。八。月。鳳。翔。節。度。使。李。勣。奏。收。復。秦。州。制。曰。自。昔。皇。王。之。有。國。也。曷。嘗。不。文。以。守。成。武。以。集。事。叅。諸。二。柄。歸。乎。大。寧。朕。猥。荷。丕。圖。思。弘。景。運。憂。勤。庶。政。四。載。于。茲。每。念。河。湟。土。疆。絲。亘。遐。闊。洎。天。寶。末。大。戎。來。我。多。難。無。方。禦。奸。遂。縱。腥。羶。不。遠。京。邑。事。更。十。葉。時。近。百。年。進。士。試。能。靡。不。竭。其。長。策。朝。廷。下。議。皆。亦。聽。其。直。詞。盡。以。不。生。邊。事。為。永。圖。且。守。舊。地。為。明。理。在。苒。於。是。收。復。無。由。今。者。天。地。儲。祥。祖。宗。垂。祐。左。社。輸。欵。邊。壘。連。降。刷。耻。建。功。所。謀。必。剋。實。樞。衡。妙。筭。將。帥。雄。稜。副。玄。元。不。爭。之。文。絕。漢。武。遠。征。之。悔。甌。脫。頓。空。於。內。地。斥。候。全。據。於。新。封。莫。大。之。休。指。期。而。就。况。將。士。等。櫛。沐。風。雨。暴。露。郊。原。披。荆。棘。而。刁。斗。夜。嚴。逐。豺。狼。而。穹。廬。曉。破。動。皆。如。意。古。無。

與京念此誠勤宜加寵賞涇原宜賜絹六萬匹靈武五萬匹鳳翔邠寧各四萬匹並以戶部產業物色充仍待季榮叔明李玘君緒各迴戈到鎮度支差脚支送四道立功將士各具名銜聞奏當議甄酬其秦威原三州及七關側近訪聞田土肥沃水草豐美如百姓能耕墾種時五年內不加稅賦五年已後重定戶籍便任為永業溫池鹽利可贍邊陲委度支制置聞奏鳳翔邠寧靈武涇原守鎮將士如能於本成處耕墾營田即度支給賜牛糧種子每年量得斛斗便充軍糧亦不限約定數三州七關鎮守官健每人給衣糧兩分一分依常年例支給一分度支加給仍二年一替換其家口委長吏切加安存官健有莊田戶籍者仰州縣放免差役秦州至隴州已來道路要置堡柵與秦州應接委李玘與劉舉即便計度聞奏如商旅往來官健又兄弟通傳家信關司並不得邀頓阻滯三州七關刺史關使將來訓練捍防有效能者並與超序官爵劔南西川沿邊沒蕃州郡如力能收復本道亦宜接借三州七關創置戍卒且要務靜如蕃人求市切不得通有來投降者申取長吏處分嗚呼七關要害三郡膏腴候館之殘趾可尋唐人之遺風尚在追懷往事良用興嗟夫取不在廣貴保其金湯得必有時詎計於遲速今則便務修築不進干戈必使足食足兵有備

無患載洽亭育之道永致生靈之安中外臣寮宜體朕意九月辛亥西川節度使杜悰奏收復維州制曰朕祗荷丕業思平泰階將分邪正之源冀使華夷胥悅其有常登元輔久奉武宗深苞禍心盜弄國柄雖已行譴斥之典而未塞億兆之言是議再舉朝章式遵彝憲守潮州司馬負外置同正負李德裕早藉門地叨踐清華累居將相之榮唯以姦傾為業當會昌之際極公台之崇聘諛佞而得君遂恣橫而持政專權生事妬賢害忠動多詭異之謀潛懷僭越之志秉直者必棄向善者盡排誣真良造朋黨之名肆譏構生加誅之豐計有踰於指鹿罪實見其欺天屬者方處鈞衡曾無嫌避委國史於愛壻之手寵秘文於弱子之身洎叅信書亦引親昵恭惟元和實錄乃不刊之書擅敢改張罔有畏忌奪他人之懿績為私門之令猷又附李紳之曲情斷成吳湘之寃獄凡彼替纓之士過其取捨之塗驕倨自夸狡竊無對摧爾之髮數罪未窮載闕罔上之由益驗無君之意使天下之人重足一迹皆讐懼奉爾而慢易在公為臣若斯於法何適於戲朕務全大體久為含容雖黜降其官榮尚蓋蔽其醜狀而睥睨未已兢惕無聞積惡既彰公議難抑是宜移授荒服以謝萬邦中外臣寮當知予意可崖州司戶叅軍所在馳驛發遣縱逢恩赦不在量移之限以起居

郎庾道蔚。禮部員外郎李汶儒。並充翰林學士。十月辛巳。京師地震。河西天德靈夏尤甚。戍卒壓死者數千人。十一月。東川節度使鄭涯。鳳翔節度使李玘。奏修文川谷路。自靈泉至白雲置十一驛。下詔褒美。經年為兩所壞。又令封款修斜谷舊路。以刑部侍郎韋有翼為御史中丞。以職方員外郎鄭處誨兼御史知雜。幽州軍亂。逐其留後張直方。軍人推其衙將周繼為留後。十二月。追謚順宗曰至德大聖大安孝皇帝。憲宗曰昭文章武大聖孝皇帝。初以河湟收復。百寮請加徽號。帝曰。河湟收復。繼成先志。朕欲追尊祖宗。以昭功烈。白敏中等對曰。非臣等愚昧所能及。至是上御宣政殿行事。及冊出。上俯僕目送。流涕嗚咽。崖州司戶叅軍李德裕卒於貶所。四年春正月。以追尊二聖。御正殿。大赦天下。徒流。比在天德者以十年為限。既遇鴻恩。例減三載。但使循環添換。邊不闕人。次第放歸。人無怨苦。其秦原威武諸州諸關。先准格。徒流人。亦量與立限。止於七年。如要住者亦聽。諸州府縣官如請工假。一月已下。權差諸廳判官。一月已上。即准勾當。例其課料等據數。每貫刻二百文。與見判案官添給。有故意殺人者。雖已傷未死。已死更生。意欲殺傷。偶然得免。並同已殺人條處分。二月。皇女萬壽公主。出降右拾遺鄭顥。以顥為銀青光祿大夫。行起居郎。駙馬都尉。三

月己卯。刑部奏監臨主守應將官物私自貸使。并貸借人。及以已物中納官司者。并專知別當主掌所由有犯贓。並同犯入已贓。不在原赦之限。從之。以幽州節度副大使檢校工部尚書張直方。為左金吾衛將軍。四月。勅法司用刑。或持巧詐分律兩端。遂成其罪。既姦吏得計。則黎庶何安。自今後應書罪定刑。宜直指其事。不得舞文妄有援引。又刑部奏准今年正月一日。勅節文。據會昌元年三月二十六日。勅。竊盜賊至一貫文。處死。宜委所司重詳定條流聞奏。臣等檢勘。並請准建中三年三月二十四日。勅。竊盜賊滿三疋已上。決殺。如贓數不充。量請科放。從之。七月丙子。大理卿劉濤奏古者懸法示人。欲使人從善遠罪。至於不犯。以致刑措。准大和二年十月二十六日。刑部侍郎高鉞條流准勘節目一十一件。下諸州府。粉壁書於錄事叅軍食堂。每申奏罪人。須依前件節目。歲月滋久。文字湮淪。州縣推案。多違漏節目。今後請下諸道。令刻石置於會食之所。使官吏起坐觀省。記憶條目。庶令案牘周詳。從之。八月。刑部侍郎御史中丞魏謩。奏諸道州府百姓誦臺訴事。多差御史推劾。臣恐煩勞州縣。先請差度支戶部鹽鐵院官帶憲街者推劾。又各得三司使奏稱院官人數不多。例專掌院務課績不辦。今諸道觀察使幕中判官。少不下五六十人。請於其中帶憲街者

委令推初。如累推有勞。能雪寃滯。御史臺闕官。便令奏用。從之。九月。以朝請大夫檢校禮部尚書孟州刺史河陽三城節度使李拭為太原尹北都留守河東節度等使幽州節度使周繼。卒。軍人立其牙將張允伸為留後。十月。中書侍郎平章事魏扶罷知政事。十一月乙亥。勅收復成維扶等三州建立已定。條令制置一切合同。其已配到流人。宜准秦原威武等州流例。十年放還。以戶部侍郎判本司事令狐綯為兵部侍郎同平章事。十二月。以華州刺史周敬復為金紫光祿大夫檢校左散騎常侍兼洪州刺史。江南西道團練觀察使。五年。春正月甲戌。制皇帝第七子洽封懷王。第八子淨為昭王。第九子汶為康王。勅兩京天下州府。起大中五年正月一日已後三年內不得殺牛。如郊廟享祀合用者。即與諸畜代。二月。戶部侍郎裴休充諸道鹽鐵轉運等使。四月癸卯。刑部侍郎劉瑒奏。據今年四月十三日已前凡二百四十四年。雜制勅計六百四十六門。二千一百六十五條。議輕重。名曰大中刑法統類。欲行用之。五月。以太原尹河東節度使李拭為鳳翔節度使。以鳳翔節度使李業檢校戶部尚書。太原尹北都留守。充河東節度使。守司空門下侍郎。太原郡開國伯。食邑一千戶。白敏中檢校司徒同平章事。邠州刺史。充邠寧節度觀察。東面招討党項等使。以

戶部侍郎判戶部事魏謩。本官同平章事。七月。宰相監修國史崔龜從。續柳芳唐曆二十二卷。上之。八月。勅公主邑司擅行文牒。恐多影庇。有奈條章。今後公主除緣徵封外。不得令邑司行文書牒府縣。如緣公事。令邑司申宗正寺與酌事體施行。汝州刺史張義潮遣兄義潭。以瓜沙伊肅等十一州戶口來獻。自河隴陷蕃百餘年。至是悉復隴右故地。以義潮為瓜沙伊等州節度使。九月。勅條流刺史交代。須一一交割公事。與知州官。方得離任。准會昌元年勅。刺史只禁科率。由抑配人戶。至於使州公廨及雜利。潤天下州府。皆有規制。不敢違越。緣未有明勅處分。多被無良人吏便致恐嚇。或致言訟起。今後應刺史下檐什物。及除替後資送錢物。但不率斂官吏。不科配百姓。一任各守州縣舊例。色目支給。如無公廨不在資送之限。若輒有率配。以入己贓論。以正議大夫兵部侍郎諸道鹽鐵轉運使上柱國河東縣開國子裴休。守禮部尚書。進階金紫。以前宣歙觀察使太中大夫檢校左散騎常侍裴諗。權知兵部侍郎。十月己亥。京兆尹韋博奏。京畿富戶於諸軍影占。苟免府縣色役。或有追訴。軍府紛然。請准會昌三年十二月勅。諸軍使不得強奪百姓入軍。從之。十一月。中書侍郎兼吏部尚書平章崔龜從。檢校尚書左僕射汴州刺史。充宣武軍節度使。沙州置歸

義軍以張義潮為節度使。大子詹事姚康獻帝王政纂十卷。又撰統史三百卷。上自開闢。下盡隋朝。帝王美政。詔令制置。銅鹽錢穀損益。用兵利害。下至僧道是非。無不備載。編年為之。國子祭酒馮審奏。文宣王廟。始太宗立之。睿宗書額。武后竊政之日。改篆題大周二字。請削之。從之。十二月。盜斫景陵神門戟。京兆尹韋博罰兩月俸。貶宗正卿李文舉。睦州刺史。陵令吳闕。岳州司馬。奉先令裴讓。隋州司馬。是歲。湖南大飢。六年。春正月。戊辰。以隴州防禦使薛達為秦州刺史。天雄軍使兼秦成階兩州經略使。二月。右衛大將軍鄭光以賜田請免租稅。宰相魏謩奏曰。鄭光以國舅之親。賜田可也。免稅無以勸蒸民。勅曰。依人戶例供稅。三月。隴州刺史薛達奏。修築定戎關功畢。四月。丁酉。勅常平義倉斛斛。每年檢勘實水旱災。處錄事參軍先勘人戶多少支給。先貧下戶。富戶不在支給之限。以禮部尚書諸道鹽鐵轉運等使裴休可本官同平章事。五月。勅天下軍府有兵馬處。宜選會兵法能弓馬等人充教練使。每年合教習時。常令教習。仍於其時申兵部。御史臺奏諸色刑獄。有關連朝官者。尚書省四品已上。諸司三品已上官。宜先奏取進止。如取諸色官狀。即申中書取裁。從之。秋七月。丙辰。前淮南節度使金紫光祿大夫檢校尚書右僕射兼揚州大都督府

長史。御史大夫。上柱國贊皇郡開國公。食邑一千五百戶。李珣卒。贈司空。勅犯贓人。平贓據律。以當時物價上絹估。請取所犯之處。其月內。上旬時估平之。從之。檢校司空。太子少師。上柱國范陽郡開國公。食邑二千戶。盧鈞。可大原尹。北都留守。河東節度使。九月。勅起居郎轉官月限。宜以二十箇月。七年。春正月。壬辰。金紫光祿大夫守太子少傅分司。上柱國晉陵郡開國公。食邑二千戶。歸融卒。贈右僕射。宗正卿李文舉。貶睦州刺史。四月。以御史大夫鄭朗為中書侍郎同平章事。五月。左衛率府倉曹張戡。集律令格式條件相類者一千二百五十條。分一百二十門。號曰刑法統類。上之。七月。以正議大夫尚書左丞。上柱國。賜紫金魚袋。崔瑛為刑部尚書。以銀青光祿大夫行兵部侍郎知制誥。充翰林學士。蘇滌為尚書左丞。權知戶部侍郎。崔璵。可權知兵部侍郎。十月。尚書左僕射門下侍郎平章事。太清宮使。弘文館大學士。崔鉉。進續會要四十卷。修撰官楊紹復。崔瑒。薛逢。鄭言等。賜物有差。八年。春正月。陝州黃河清。二月。南蠻進犀牛。詔還之。三月。勅以早詔使疏決繫囚。宰相監修國史。魏謩。修成文宗實錄。四十卷。上之。修史官給事中盧耽。大常少卿蔣偕。司勳員外郎王溥。右補闕盧吉。領賜銀器錦綵有差。以山南東道節度使檢校戶部尚書襄州刺史。上

柱國酒泉縣開國子食邑三百戶李景讓為吏部尚書五月以中書舍人翰林學士常澳為京兆尹以戶部侍郎翰林學士承旨上柱國武功縣開國子食邑三百戶蘇滌檢校兵部尚書兼江陵尹御史大夫充荆南節度管內觀察處置等使七月銀青光祿大夫守門下侍郎同平章事魏謩兼戶部尚書八月以司農卿鄭助為檢校左散騎常侍兼夏州刺史御史大夫上柱國滎陽縣開國男食邑三百戶夏綏銀宥等州節度營田觀察處置押蕃落安撫平夏党項等使九年春正月辛巳銀青光祿大夫秘書監許昌縣開國男陳商卒贈工部尚書二月中書侍郎兼禮部尚書同平章事裴休檢校吏部尚書兼汴州刺史御史大夫充宣武軍節度使汴宋毫穎觀察處置等使三月試弘詞舉人漏泄題目為御史臺所劾侍郎裴諗改國子祭酒郎中周敬復罰兩月俸料考試官刑部郎中唐枝出為虔州刺史監察御史馮顥罰一月俸料其登科十人並落下其吏部東銓委右丞盧懿權判以吏部侍郎鄭涯檢校禮部尚書兼定州刺史御史大夫充義武軍節度易定等州觀察處置北平軍等使御史臺據正月八日禮部貢院捉到明經黃績之趙弘成全質等三人偽造堂印堂帖兼黃績之偽著緋衫將偽帖入貢院令與舉人虞蒸胡簡党贊等三人及第許得錢

一千六百貫文據勘黃績之等罪款具招造偽所許錢未曾入手便事欺奉勅並准法處死主司以自獲姦人並放七月以河東節度使檢校司空太原尹北都留守上柱國范陽郡開國公食邑二千戶盧鈞守尚書右僕射八月以門下侍郎尚書右僕射監修國史博陵縣開國伯食邑一千戶崔鉉檢校司空同平章事兼揚州大都督府長史充淮南節度副大使知節度事宣宗宴餞賦詩以賜之九月昭義節度使檢校禮部尚書兼潞州大都督府長史御史大夫上柱國賜紫金魚袋鄭洵檢校刑部尚書太原尹北都留守御史大夫充河東節度管內觀察處置等使十一月以河南尹劉瑒檢校工部尚書汴州刺史兼御史大夫充宣武軍節度宋毫汴穎觀察處置等使以中書舍人鄭顥為禮部侍郎十年春正月乙巳以正議大夫華州刺史潼關防禦鎮國軍等使上柱國隴西縣開國男食邑三百戶賜紫金魚袋李訥檢校左散騎常侍兼越州刺史御史大夫浙江東道都團練觀察等使三月中書門下奏據禮部貢院見置科目開元禮三禮三傳三史學究道舉明算童子等九科近年取人頗濫曾無實藝可採徒添入仕之門須議條流俾精事業臣已於延英面論伏奉聖旨將文字來者其前件九科臣等商量望起大中十年權三年滿後至時赴科試者

令有司據所舉人先進名。令中書舍人重覆問過。如有本業稍通。堪備朝廷顧問。即作等第進名。候勅處分。如有事業荒蕪。不合送名數者。考官當議朝責。其童子。近日諸道所薦送者。多年齒已過。偽稱童子。考其所業。又是常流。起今日後。望令天下州府薦送童子。並須實年十一十二已下。仍須精熟一經。原缺全通。兼自能書寫者。如違制條。本道長吏亦議懲罰。從之。四月癸丑。以邢部郎中盧搏為廬州刺史。以終事中。渤海郡開國公。食邑二千戶高少逸。檢校禮部尚書。華州刺史。潼關防禦鎮國軍等使。六月。以兵部郎中裴夷直為蘇州刺史。九月。以中書舍人杜審權知禮部貢舉。十月。以邠寧慶節度使檢校禮部尚書。邠州刺史。上柱國賜紫金魚袋畢誠。為檢校兵部尚書。潞州大都督府長史。御史大夫。充昭義軍節度副大使。知節度事。潞。邢。洺。等州觀察使。桂管觀察使。令狐定卒。贈禮部尚書。十一年春正月。以銀青光祿大夫守吏部尚書。上柱國酒泉縣開國男。食邑三百戶李景讓為御史大夫。以朝請大夫守御史中丞。兼尚書右丞。上柱國賜紫金魚袋夏侯孜。為戶部侍郎。判戶部事。以朝散大夫守京兆尹。上柱國扶風縣開國男。食邑三百戶。賜紫金魚袋。常澳。檢校工部尚書。孟州刺史。御史大夫。充河陽三城節度孟。懷。澤。觀察處置等使。先是車駕將幸

華清宮。兩省官進狀論奏。詔曰。朕以驪山近宮。真聖廟貌。未嘗修謁。自謂闕然。今屬陽和氣清。中外事簡。聽政之暇。或議一行。蓋崇禮敬之心。非以盤遊為事。雖伸勅命。兼慮勞人。卿等職備禁闈。志勤奉上。援據前古。列狀獻章。載陳懇到之詞。深覩盡忠之節。已允來請。所奏知。以劍南西川節度副大使。知節度事。管內觀察處置。統押近界諸蠻。及西山八國雲南安撫等使。特進檢校司徒。同中書門下平章事。兼成都尹。上柱國太原郡開國公。食邑二千戶白敏中。以本官兼江陵尹。充荆南節度管內觀察處置等使。二月。以夏綏銀宥節度使通議大夫。檢校左散騎常侍。夏州刺史。御史大夫。上柱國榮陽縣開國男。食邑三百戶。賜紫金魚袋。鄭助。為檢校工部尚書。邠州刺史。充邠寧慶節度管內營田觀察處置。兼充慶州南路救援鹽州。及當道沿路鎮寨糧料等使。以右金吾衛將軍田在賓。檢校右散騎常侍。兼夏州刺史。代鄭助。為銀宥節度等使。以荆南節度使。銀青光祿大夫。檢校兵部尚書。兼江陵尹。御史大夫。上柱國武功郡開國男。食邑三百戶蘇滌。為太常卿。以銀青光祿大夫守門下侍郎。兼戶部尚書。同平章事。監修國史。上柱國魏謩。檢校戶部尚書。同平章事。兼成都尹。充劍南西川節度副大使。知節度事。以太中大夫守工部尚書。上柱國賜紫金魚袋。

崔慎由為中書侍郎同平章事。以成德軍節度鎮冀深。趙觀察處置等使。起復雲麾將軍。守左金吾衛大將軍。同正檢校兵部尚書。鎮州大都督府長史。王紹鼎為銀青光祿大夫。檢校尚書右僕射。餘官如故。以通議大夫守中書侍郎兼禮部尚書。同平章事。集賢殿大學士。上柱國。賜紫金魚袋。鄭朗可監修國史。太中大夫。守工部尚書。同平章事。上柱國。賜紫金魚袋。崔慎由可集賢院大學士。三月起復。朝請大夫。深州刺史。御史大夫。兼成德軍節度判官。王紹懿可檢校左散騎常侍。鎮府左司馬。知府事。充成德軍節度副使。兼充都知兵馬使。以成德軍中軍兵馬使。銀青光祿大夫。檢校太子賓客。兼監察御史。上柱國。王景胤可本官。深州刺史。本州團練守捉使。檢校左散騎常侍。右神武衛大將軍。知軍事。王紹孚可落起復。依前右神武衛大將軍。紹懿。紹孚。鎮州王紹鼎之弟也。景胤。紹鼎子也。以朝請大夫。檢校刑部尚書。華州刺史。上柱國。鄭縣開國男。食邑三百戶。賜紫金魚袋。蕭倣為太子賓客。分司東都。四月。以職方郎中。知制誥。裴坦為中書舍人。以朝議大夫。權知京兆尹。崔郢為濮王傅。分司東都。以次殺府吏也。以江西觀察使。洪州刺史。御史中丞。上柱國。賜紫金魚袋。張毅夫為京兆尹。以鳳翔節度使。正議大夫。檢校戶部尚書。兼鳳翔尹。上柱國。襲晉國公。食邑三

千戶。襲實封一百五十戶。裴識可許州刺史。充中武軍節度。陳許觀察。觀察等使。以吏部侍郎。盧懿。檢校工部尚書。兼鳳翔尹。御史大夫。鳳翔隴右節度使。以中舍舍人。鄭憲為洪州刺史。御史中丞。江南西道都團練觀察。處置等使。仍賜紫金魚袋。以安南宣慰使。右千牛衛大將軍。宋涯為安南都護。御史中丞。本管經略。招討處置等使。幽州節度使。張允。仲。第。允。中。為薊州刺史。允。千。檀州刺史。允。辛。安塞軍使。允。舉。納。降。軍。使。並兼御史中丞。以前邠寧節度使。朝議大夫。檢校工部尚書。邠州刺史。上柱國。賜紫金魚袋。柳意可檢校禮部尚書。河南尹。五月。以職方郎中。李玄為壽州刺史。六月。以朔方靈武定遠等城節度使。朝散大夫。檢校左散騎常侍。靈州大都督府長史。上柱國。賜紫金魚袋。劉潼為鄭州刺史。馳驛赴任。以給邊兵糧不及時也。以安南都護。宋涯為容州刺史。容管經略。招討處置等使。制皇弟三男。灌。封衛王。第十一男。灘。封廣王。以朝散大夫。守尚書兵部侍郎。判度支。上柱國。彭城縣開國男。食邑三百戶。賜紫金魚袋。蕭鄴。本官。同平章事。判度支。以右監門將軍。知內府省事。清河公。崔巨淙。為淮南監軍。以特進。檢校司空。兼太子太傅。分司東都。上柱國。扶風郡開國公。食邑二千戶。杜悰。本官。判東都尚書省。兼御史大夫。充東都留守。東畿汝都防禦使。七月。以

飛龍使官闡局令王歸長守內侍省內常侍知省事充內樞密使責授邠州負外司馬張直方為右驍衛大將軍分司東都八月成德軍節度使檢校尚書右僕射王紹鼎卒贈司空賜布帛三百段以皇子昭王瀛為開府儀同三司守鎮州大都督府長史成德軍節度鎮冀深趙觀察等大使以成德軍節度副使都知兵馬使左司馬知府事御史中丞王紹懿為成德軍兩使留後以義武軍節度易定觀察等使檢校禮部尚書定州刺史上柱國滎陽縣開國男食邑三百戶鄭涯檢校戶部尚書汴州刺史上柱國充宣武軍節度副大使知節度事宋毫觀察亳州太清宮等使以四鎮北庭行軍涇原渭武節度使銀青光祿大夫檢校右散騎常侍涇州刺史御史大夫上柱國范陽縣開國男食邑三百戶盧簡求可檢校工部尚書定州刺史義武節度使易定觀察北平軍等使以鹽州防禦押蕃落諸軍防秋都知兵馬使度支烏池榷稅等使檢校右散騎常侍鹽州刺史上柱國賜紫金魚袋陸耽代簡求為涇原節度使以翰林學士朝散大夫中書舍人賜紫金魚袋曹確權知河南尹汝州防禦使令狐緒有善政郡人詣闕請立德政碑頌緒以弟緇在中書上表乞寢從之以太常卿蘇滌為兵部尚書權知吏部銓事以銀青光祿大夫守左散騎常侍上柱國渤海郡開

國伯食邑七百戶封教為太常卿是月熒惑犯東井九月以秦州刺史李承勳為朝散大夫檢校工部尚書涇州刺史充四鎮北庭涇原渭武節度等使以禮部郎中楊知溫充翰林學士以中散大夫尚書禮部侍郎上柱國賜紫金魚袋杜審權為陝州大都督府長史兼御史大夫陝虢都防禦觀察處置等使以銀青光祿大夫檢校司空兼太子太師上柱國范陽郡開國公食邑二千戶盧鈞為檢校司空同中書門下平章事興元尹充山南西道節度等使右補闕陳駿左拾遺王譜右拾遺薛廷傑上疏諫遣中使往羅浮山迎軒轅先生詔曰朕以萬機事繁躬親庶務訪聞羅浮山處士軒轅集善能攝生年齡亦壽乃遣使迎之或冀有少保理也朕每觀前史見秦皇漢武為方士所惑常以之為誡卿等位當論列職在諫司闕示來章深納誠意仍謂崔慎由曰為吾言於諫官雖少翁樂大復生不能相惑如聞軒轅生高士欲與之一言耳宰相崔慎由兼修國史蕭鄴兼集賢殿大學士乙未望出于房初長三尺十月制通議大夫守中書侍郎禮部尚書同平章事監修國史上柱國賜紫金魚袋鄭朗可檢校尚書右僕射兼太子少師以前山南西道節度使中散大夫檢校禮部尚書興元尹上柱國賜紫金魚袋蔣係權知刑部尚書宰相崔慎由兼修國史蕭鄴兼集賢殿大學

士以華州刺史高少逸為左散騎常侍以蘇州刺史裴夷直為華州刺史潼關防禦鎮國軍等使以太常少卿崔鈞為蘇州刺史入迴鶻冊禮使衛尉少卿王端章貶賀州司馬副使國子禮記博士李溥為郴州司馬判官河南府士曹李寂永州司馬端章等出塞黑車子阻路而迴故也以成德軍觀察留後御史中丞賜紫金魚袋王紹懿檢校工部尚書兼鎮州大都督府長史御史大夫充成德軍節度鎮冀深趙觀察等使以中書舍人李潘權知禮部貢院十一月太子少師鄭朗卒贈司空銀青光祿大夫檢校尚書右僕射兼太子太保充右羽林統軍御史大夫上柱國滎陽縣開國男食邑三百戶鄭光卒輟朝三日贈司徒仍令百官奉慰上之元舅也宰相崔慎由為中書侍郎兼禮部尚書蕭鄴兼工部尚書餘並如故十二月以昭義軍節度使朝議大夫檢校工部尚書上柱國平陰縣開國男食邑三百戶畢誠為太原尹北都留守河東節度使朝議大夫檢校禮部尚書兼太原尹北都留守上柱國賜紫金魚袋劉瑒為尚書戶部侍郎判度支以翰林學士承旨通議大夫尚書戶部侍郎知制誥上護軍賜紫金魚袋蔣伸為兵部侍郎充職以金紫光祿大夫守太子少保分司東都上柱國河東縣開國男食邑五百戶裴休檢校戶部尚書兼潞州大都督府長史

昭義軍節度副大使知節度事潞磁邢洛觀察等使以正議大夫行尚書兵部侍郎上柱國河東縣開國男食邑三百戶賜紫金魚袋柳仲郢本官兼御史大夫充諸道鹽鐵轉運使以正議大夫檢校戶部尚書兼太子賓客上柱國賜紫金魚袋孔溫業本官分司東都以病請告故也禮部郎中楊知溫本官知制誥充翰林學士以幽州中軍使檢校國子祭酒幽府左司馬知府事御史中丞張簡真可檢校右散騎常侍允伸之子也以中散大夫權知刑部尚書上柱國賜紫金魚袋蔣係檢校戶部尚書鳳翔尹御史大夫鳳翔隴右節度觀察處置等使是歲舒州吳塘堰有衆禽成巢闊七尺高一丈而水禽山鳥鷹隼鷺雀之類無不馴狎又有鳥人面綠毛爪喙皆紺色其聲曰甘人呼為甘蟲

永樂大典卷之七千一百四

永樂大典卷之七千一百五

十八陽

唐 宣宗二

舊唐書十二年春正月以晉陽令鄭液為通州刺史羅浮山人軒轅集至京師上召入禁中謂曰先生遐壽而長生可致乎曰徹聲色去滋味哀樂如德施周給自然與天地合德日月齊明何必別求長生也留之月餘堅求還山三月以前鄉貢進士于琮為秘書省校書郎尋尚皇女廣德公主改銀青光祿大夫守右拾遺駙馬都尉以安南本管經畧招討處置使朝散大夫檢校左散騎常侍安南都護御史大夫賜紫金魚袋李弘甫為宗正卿以中大夫守京兆尹上柱國賜紫金魚袋張毅夫為鄂州刺史御史大夫鄂岳蘄黃申等州都團練觀察使以太中大夫福州刺史御史中丞上柱國賜紫金魚袋楊發檢校右散騎常侍廣州刺史御史大夫充嶺南東道節度觀察處置等使以朝散大夫守康王傅分司東都上柱國襲魏郡開國公食邑二千戶賜紫金魚袋王式為安南都護兼御史中丞充安南本管經畧招討處置等使以朝請大夫前守太子賓客分司東都上柱國鄴縣開

國男食邑三百戶。賜紫金魚袋蕭倣。守太子少保。分司。以朝請大夫檢校右散騎常侍右金吾大將軍充右衛使上柱國襲太原郡開國公食邑二千戶。賜紫金魚袋王鎮。為檢校左散騎常侍。使持節都督福州諸軍事兼福州刺史。御史大夫。充福建等州都團練觀察處置等使。以翰林學士朝議郎守尚書司勳郎中。知制誥。賜緋魚袋孔溫裕。為中書舍人。充職。以右驍衛上將軍李正源。守大內皇城留守。以朝議大夫守尚書戶部侍郎。判度支。上柱國。賜紫金魚袋劉瑒。本官同平章事。依前判度支。以太中大夫守中書侍郎。兼禮部尚書。同平章事。監修國史。上柱國。賜紫金魚袋崔慎由。檢校禮部尚書。梓州刺史。御史大夫。劔南東川節度副大使。知節度事。代常有翼。以有翼為吏部侍郎。二月。以前邕管經略招討處置使。朝議郎邕州刺史。御史中丞。賜紫金魚袋段文楚。為昭武校尉。右金吾衛將軍。以朝議郎守中書舍人。權知禮部貢舉。上柱國。賜緋魚袋李潘。為尚書禮部侍郎。以朝散大夫守工部尚書。同平章事。充集賢殿大學士。上柱國。彭城縣開國男。食邑三百戶。賜紫金魚袋蕭鄴。為監修國史。以朝議大夫守戶部侍郎。同平章事。判度支。上柱國。賜紫金魚袋劉瑒。可充集賢院學士。以渤海國王弟權。知國務。疑虔晃為銀青光祿大夫。檢校秘書監。忽汗州都督。

冊為渤海國王。以兵部侍郎柳仲郢。為刑部尚書。以朝議大夫守尚書戶部侍郎。判戶部事。上柱國。賜紫金魚袋夏侯孜。為兵部侍郎。充諸道鹽鐵轉運使。以朝請大夫。權知刑部侍郎。賜紫金魚袋杜勝。為戶部侍郎。判戶部事。以光祿大夫守左領軍衛大將軍。分司東都。上柱國。會稽縣開國公。食邑一千五百戶。康季榮。可檢校尚書右僕射。兼左衛上將軍。分司。駐前利州刺史杜倉。為賀州司戶。蔡州刺史李叢。邵州司馬。以工部郎中。知制誥于德孫。庫部郎中。知制誥苗恪。並可中書舍人。依前翰林學士。以前右金吾將軍鄭漢璋。前鴻臚少卿鄭漢卿。並起復授本官。國舅光之子也。以銀青光祿大夫。行給事中。騎馬都尉衛洙。為工部侍郎。前濮王傅。分司。皇甫權。為康王傅。分司。以庫部員外郎。史館修撰李渙。為長安令。閏二月。以司農少卿盧籍。為代州刺史。前江陵少尹杜惲。為司農少卿。以河東馬步都虞候段威。為朔州刺史。充天寧軍使。兼興唐軍沙陀三部落防遏都知兵馬使。五月。以兵部侍郎鹽鐵轉運使夏侯孜。本官同平章事。六月。南蠻攻安南府。八月。洪州賊毛合。宣州賊康全。大攻略郡縣。詔兩浙兵討平之。十二月。太子少保魏謩卒。贈司徒。十三年。春正月。以陝虢觀察使杜審權。為戶部侍郎。判戶部事。三月。宰相盧鄴罷。知政事。守吏部尚書。四月。以

翰林學士承旨。兵部侍郎。知制誥蔣伸。本官同平章事。五月。上不豫。月餘不能視朝。八月七日。宣遺詔立郟王為皇太子。幼當軍國事。是日崩于大明宮。聖壽五十。詔門下侍郎平章事令狐綯攝冢宰。群臣上謚曰聖武獻文孝皇帝。廟號宣宗。十四年三月。葬于貞陵。史臣曰。臣嘗聞黎老言。大中故事。獻文皇帝。器識深遠。久歷艱難。備知人間疾苦。自寶歷已來。中人擅權。事多假借。京師豪右。大擾窮民。洎大中臨馭。一之日。權豪歛迹。二之日。姦臣畏法。三之日。閹寺讐氣。由是刑政不濫。賢能效用。百揆四嶽。穆若清風。十餘年間。頌聲載路。上宮中衣澣濯之衣。常膳不過數器。非母后備膳。輒不舉樂。歲或小飢。憂形于色。雖左右近習。未嘗見怠惰之容。與群臣言。儼然煦接。如待賓僚。或有所陳聞。虛襟聽納。舊時人主所行。黃門先以龍腦鬱金藉地。上悉命去之。宮人有疾。醫視之。既瘳。即袖金賜之。誠曰。勿令勅使知。謂予私於侍者。其恭儉好善如此。季年風毒。召羅浮山人軒轅集。訪以治國治身之要。其伎術詭異之道。未嘗措言。集亦有道之士也。十三年春。堅求還山。上曰。先生少留一年。俟於羅浮別創一道館。集無留意。上曰。先生捨我亟去。國有災乎。朕有天下。曆得幾年。集取筆寫四十字。而十字挑上。乃十四年也。興替冥數。其若是乎。而帝道皇猷。始終無缺。雖漢

之文景。不是過也。惜乎簡籍遺落。舊事十無三四。吮墨揮翰。有所憊然。贊曰。李之英主。實惟獻文。純粹盡去。淑慝斯分。河隴歸地。朔漢消氛。到今遺老。歌詠明君。馬永易元和錄。大中元年。春二月。勅自今及第進士。放榜後。任依舊宴集。更不禁止。以檢校司徒東都留守李德裕為太子少保。分司東都。初李德裕執政。引白敏中為翰林學士。自負外凡五年十三遷。及武宗崩。德裕失勢。敏中乘上下之怒。竭力排之。雷同毀舉。無一言伸理。且使其黨李威。訟德裕輔政日陰事。故有是命。議者訾惡敏中。德裕後著書言。惟以怨報德。為不可測。蓋斥敏中云。敏中又以大理卿馬植為刑部侍郎。充鹽鐵轉運使。植數以文學政事有名於時。李德裕不之重。內外怨望。及敏中秉政。凡德裕所薄者。皆不次用之。江州刺史楊嗣復。為岳州刺史。彬州刺史李珣。為舒州刺史。安州長史崔珙。為虢州刺史。衡州長史牛僧孺。為汝州長史。三月。以刑部尚書判度支崔元式。為門下侍郎。翰林學士。戶部侍郎韋琮。為中書侍郎。並同平章事。閏月。勅會昌五年所廢寺宇。如有宿舊名僧。復能修創。一任住持。不得禁止。六月。上謂敏中曰。朕昔從憲宗之喪。道遇風雨。百官六宮皆避。惟山陵使長而多髯。攀靈駕不去。誰耶。對曰。令狐楚。上曰。有子乎。對曰。長子緒。今為隨州刺史。上曰。堪為相乎。對曰。少病風痺。次子綯。

前湖州刺史。其為人宰相器也。上即擢為考功郎中。知制誥。緇入謝。上問以元和故事。緇條對甚悉。上悅。遂有大用意。八月。李回罷宰相。出為劍南西州節度使。九月。時德裕既去位。李紳已卒。崔鉉等久不得志。乃導前河南府永寧尉吳汝訥。使其弟湘訟。言湘素清直。為人誣讒。大校重牢。五木被體。吏至以聚妻資勝結賊。且言顏悅故士族。湘罪皆不當死。紳與德裕相表裏。欺罔武宗。枉殺之。又言湘死。紳令即瘞。不得歸葬。按紳以舊宰相鎮一方。恣威權。凡戮有罪。猶待秋分。湘無辜。盛夏被殺。乞召江州司戶崔元藻等對辯。元藻銜德裕斥已。即翻其辭。因言御史覆獄還。皆對天子別白是非。德裕權軋天下。徇私背公。使不得對。具獄不付有司。黨庇李紳。但用紳奏而寘湘死。蓋以鄭亞首倡。鄭元壽扶同。李恪構成。李回即奏。皆由附會權勢。以屈孤單。時德裕既失權。而宗閔故黨。令孤緇。崔鉉。白敏中。皆當路。因是逞憾。以利誘動元藻等。使三司結紳杖鉞。作藩。虐殺良平。准神龍詔書。酷吏殺者。官爵皆奪。子孫不得進官。紳雖亡。請從春秋戮死者之比。大理御盧言。刑部侍郎馬植。御史中丞魏扶。言紳殺無罪。德裕徇成其寃。至為黜御史。罔上不道。十二月。詔貶太子少保分司東都李德裕。為潮州司馬。植判李紳。任崇黃門。官列中樞。肆虐毒於藩方。視人命如草芥。倚德裕回天之

力。構吳湘沒地之寃。生殺在心。是非由己。因之而竄黜者頗衆。不從而斃路者至多。茂棄典章。莫斯為甚。雖年如過隙。幸已云亡。而虛實在人。固當餘責。狀以春秋戮死之義。律令著削官之條。將欲懲戒存亡。恐須追奪官爵。昔于公平心決獄。既慶流於子孫。今李紳縱意殺人。合咎及於裔嗣。其子孫伏請三五年內。不許官宦。依判錄奏者。御史中丞魏扶判。依斷。大理卿盧言。又奏斷太子少保分司東都李德裕。嘗秉國權。志懷黨庇。正吳湘之賊坐。不付法司。寘元藻於罪。懲取證下吏。據吳汝訥狀。稱李德裕黨庇李紳。斷汝訥弟湘處死。得劉群狀。稱與李德裕書。計會杖殺吳湘。事得報。令但奏來。又據崔元藻狀。李紳誣奏已見。德裕欺罔可知。唯弄威權。情隨好惡。此獄是鄭亞首倡。元壽扶同。李恪構成。李回便奏。皆由附會權勢。以抑孤單者。今據路遠不取伏款。謹具衆證事條如前。刑部侍郎馬植判。德裕當武宗一朝。位居上相。獨持大柄。橫制萬機。徇李紳縱殺之心。置吳湘枉死之地。公是者悉從貶黜。順非者無不超昇。宰相二人不同惡罷免。御史四輩皆無過右遷。首紊國章。坐鉗人口。賴逢明代。得辯寃人。駭衆欵。備得其情。詳法文難為捨罪。御史中丞魏扶判。依斷。御史臺又奏。據推官勘得吳汝訥狀。所論弟湘寃死。根本事條至多。數內一件阿顏衣服等。淮南

雖不許贓。亦被於奏狀收登。今但得弟湘昭雪。汝訥不避死亡之刑。伏乞
詳察處分。大理卿盧言斷吳汝訥出自單門。深懷至性。痛加手足。恨切肌
膚。艱難困苦之中。號訴軒墀之側。遂得恩加泉壤。仁及賤微。不逃驚擊之
餘威。終雪錫泉之大戮。請加教獎。以勸友于。伏望委中書門下量與處分。刑
部侍郎馬植。御史中丞魏扶。並判依斷。勅曰。錄其自初。則付以國權。懲彼
保奸。則舉茲朝憲。此王者所以本人情。而張法理也。特進行太子少保分
司東都上柱國衛國公。食邑三千戶。李德裕。憑藉鎡基。累塵台案。不能盡
心奉國。竭節佐君。事必徇情。政多任己。愛憎頗乖於公道。陞黜或在於私
門。遂使冤塞之徒。日聞於騰口。猜疑之者。不得以恣心。豈可尚居保傅之榮。猶
列清崇之地。宜加竄謫。以戒僻回。嗚呼。朕臨御萬方。推誠庶物。顧彼纖頃。
皆欲保安。豈於將相舊臣。獨遺恩顧。而群議不息。謗書日盈。爰舉典章。事
非獲已。凡百寮庶士。宜體朕懷。可潮州司馬。負外置同正。負仍所在馳驛發
遣。縱逢恩赦。不在量移之限。始德裕在翰林。有日者謂曰。公位極人臣。厄
在白馬。及登相位。雖親族無有畜白馬者。洎白敏中因其失勢。且命馬植
鞫汝訥之獄。由是竄貶。白馬之厄。乃驗於此。是時吳湘之獄。朝廷公卿無
為辯者。惟淮南觀察推官魏釗就逮。吏使誣引德裕。獨明獄情。無枉。雖痛

楚掠終不從。又丁柔立者。德裕當國時。或薦其直清。可任諫官。不用。上即
位。為右補闕。德裕貶潮州。柔立內慙。復之上書。直其冤。劉濛晏之孫也。會
昌初。擢給事中。以材為德裕所知。時回鶻衰。朝廷經畧河湟。遣濛按
邊。調兵械糧餉。為宣慰靈夏。以北党項使。始議造木牛運。至是以德裕得
罪。貶濛朗州刺史。吏部奏諸州縣官。准會昌四年勅。停減州縣官一千二
百一十四員。今准勅添置。量增三百八十三員。從之。大中二年正月。

右補闕丁柔立。以申理李德裕。坐阿附。貶南陽尉。劍南西川節度使李回。
貶湖南觀察使。桂管觀察使鄭亞。貶循州刺史。前淮南觀察判官魏釗。貶
吉州司戶參軍。前淮南推官元壽。貶韶州司戶參軍。天長縣令張洪思。前
揚州錄事參軍李公佐。各削兩官。李恪杖脊十五。配流天德。故淮南節度
使李紳。追奪三官。子孫不得仕。皆以吳湘獄事被罪。始紳以文藝節操見
用。而屢為怨仇所根。却卒能自伸其才。以名位終。然所至務為威烈。或
陷暴刻。故雖沒而生。湘冤云。回為人強幹。所泣無不辨。雅為德裕所知。
及鎮浙西。辟幕府。又累佐李紳幕。及任中丞。薦為刑部郎中。史館
脩撰。重修憲宗實錄。初武宗代宗伐虜。河朔列鎮。陰相諱。以撓兵事。德裕
薦回持節往諭。何洪恭。王元逵。以澤潞通京洛。非若河北三鎮。國家許世

以壤地傳子孫者。二將聽命。復以回為使。督戰有功。由是拜相。武宗崩。為山陵使。出領劔南。以回與德裕善。決吳湘獄時。回為中丞。坐不糾擿。故貶。芝田錄云。會昌中。王師討昭義。久未成功。賊之將兵。往往散出山下。剽掠邢洛懷孟。又發輕卒數千。為群羊。散漫山谷。以啗官軍。官軍自遠見之。乃分頭掩捕。因不成列。且無備焉。於是短兵接鬪。蹂踐相乘。凡數十里。王師大敗。是月。東都及境上諸州。聞之大震。咸加備戒。嚴都統。王宰。石雄等。皆堅壁自守。武宗坐朝不怡。召宰臣李德裕等。謂之曰。王宰。石雄。不與朕殺賊。頻遣中使促之。尚聞逗撓。依違。豈可使賊黨坐至東都耶。卿今日可為朕晚歸。別與制置軍前事宜奏來。時宰相陳夷行。鄭肅。拱默聽命。德裕歸中書。即召御史中丞李回。具言意曰。中丞必一行責戎歸。早見成功。慎無遲也。回刺時受命。於是具名以聞。曰。今欲以御史中丞李回為催陣使。帝曰。可。即日李回自右銀臺戒路。有邸吏五十導從。至於河中。緩轡以進。侯王宰等至河中界迎候。乃行。二帥至翼城東道左。執兵如外府列校迎候儀。回立馬受起居寒溫之禮。二帥復前進數步。聲折致詞。回擊鞭亦不堪。願之。禮成。二帥旁行。俛首俟命。回於馬上厲聲曰。今日當直令史安在。群吏躍馬聽命。回曰。責破賊限狀來。二帥鞠躬流汗而退。請以六十日破賊。過

約請行軍令。於是二帥大懼。辛親軍而鼓之。士卒齊進。凡五十八日。拔潞城。梟劉瑱首以獻。功成。回復命。後六十日。由御史中丞拜相。至是。貶湖南觀察使。以吳湘兄前永寧尉汝訥。為左拾遺。江州司戶崔元藻。為京兆府武功令。尚書舍人崔徽。誼士也。坐草德裕制。不肯巧傳以罪。辭不深切。貶端州刺史。司空分司李固言。為右僕射。固言李珣楊嗣復黨也。二月。岳州刺史李珣。並為太子賓客。分司東都。五月。以兵部侍郎判度支周墀。刑部侍郎馬植。並同平章事。初。墀為義成節度使。辟韋渙為判官。及為相。謂渙曰。力少任重。何以相助。渙曰。願相公無權。墀愕然。不知所謂。渙曰。官賞刑罰。與天下共。可否。勿以己之愛憎喜怒移之。天下自理。何權之有。墀深然之。秋七月。以李珣為檢校兵部都尚書。河陽節度使。絳州長史李漢。初以李宗閔黨。貶汾州司馬。徙絳州。至是。宰相言其枉。以為宗正少卿。崔珙為檢校右僕射。鳳翔節度使。牛僧孺為太子少師。依前分司。宰相周墀。本李宗閔黨。方李德裕為相。易元和實錄。墀跡不可。至是。建言德裕會昌言。以恩換元和實錄四十篇。竄寄它書事。以廣父功。凡人君尚不改史。取必信也。遂削新書。秋九月。再貶潮州司馬。李德裕為崖州司戶。縱逢恩赦。不在

量移之限。貶德裕子前汴州觀察判官燁。為象州立山縣尉。並所在馳驛發遣。勅曰。朕祗荷玉業。思平泰階。將分邪正之流。冀使華夷胥悅。其有嘗登元輔。又奉武宗。深苞禍心。盜弄國柄。雖行譴斥之典。未塞億兆之言。是用再舉朝章。式遵彝憲。守潮州司馬負外置同正負李德裕。早藉門地。叨踐清華。累膺將相之榮。唯以姦傾為業。當會昌之際。極公台之崇。驕諛佞而得君情。遂恣橫而持國政。專權生事。妬賢害忠。動多詭異之謀。潛懷僭越之志。秉直者必棄。嚮善者盡排。誣真良。造明黨之名。肆讒構。生加誅之釁。計有踰於指庖。罪實見於欺天。頃者方處鈞衡。曾無嫌避。委國史於愛壻之手。寵秘文於弱子之身。洎參命書。亦引親昵。恭惟元和實錄。乃不刊之書。擅敢改張。罔有畏忌。奪他人之懿績。為私門之令猷。又附會李紳之曲情。斷成兵湘之冤獄。凡彼簪纓之士。遏其進取之塗。驕倨自誇。狡獪無對。揮爾之髮。數罪未窮。再規罔上之由。益驗無君之意。使天下之士。重足一跡。皆懾懼奉爾。而慢易在公。為臣至此。於法何追。於戲。朕務全物體。久為含私。雖黜降其官榮。尚蓋蔽其醜狀。而睥睨未已。兢惕無聞。積惡既彰。公議難抑。是宜移投荒服。以謝萬方。中外臣寮。當鑒于旨。可崖州司戶參軍。負外置同正負。仍仰所在馳驛發遣。縱逢恩赦。不在量移之限。又勅

曰。前汴州觀察判官。朝議郎檢校尚書祠部員外郎。兼侍御史李燁。書稱又當于獲。蓋是常理。苟不肯播。孰知艱難。况爾又嘗持國權。處事平當。爾合動作匡諫。推以必誠。豈有冒進偷安。真於有過。情頗異於直在。禮實遠於敬同。况有異辭。駭吾聞聽。且務含忍。不令究窮。須至播遷。稍為懲戒。慰于遐服。猶為寬恩。可守象州立山縣尉。同正負。仍即所在。馳驛發遣。初德裕被遇武宗。會昌末。皇子益王充王。年已皆長。定策之際。宜無他辭。故深忤帝意。且惡其專。由是朋黨快吳湘等事。以希上旨。卒竄窮荒。湖南觀察使李回。以嘗附德裕。再貶為太子賓客。分司東都。制下。給事中封還。以為責薄。遂貶賀州刺史。久之。徙撫州長史。卒。據言云。大和初。李回任京兆府參軍。主試。不送魏謩。謩深銜之。會昌中。回為刑部侍郎。謩為御史中丞。常與次對官。三數人候對於閣門。謩曰。某頃歲府解。蒙明公不送。何事。今日同集於此。回應聲答曰。經頭至如今。也不送。謩為之色變。蓋懷憤恚。後回謫刺建州。謩大拜。回有答狀。謩悉不納。既而回怒一衙官。杖勒停。建州衙官能庇徭役。求隸籍者。所費不下數十萬。其人不恚於杖。止恨停廢耳。因亡命至京師。接時相訥寬。諸相皆不問。會亭于憇於槐陰。顏色憔悴。旁人察其有故。私詰之。其人具述本意。於是誨之曰。建陽相公素與中書相公

有隙。子盍詣之。言訖見魏導。騎自中書而下。其人常懷文狀。即如所誨。望塵而拜。導從問之。對曰。建州百姓訴寃。魏聞之。例持塵尾敲檐。子門令止。及攬狀所論事二十餘件。第一件取同姓子女入宅。於是為魏極力。數成大獄。時李已量移鄧州刺史。行次九江。遇吏鞠獄。却回建陽。竟坐殿撫州司馬。終於敗所。與本傳及餘說不同。聊記于此。冬十月。前鳳翔節度使石雄詣政府。自陳黑山烏嶺之功。求一鎮以終老。宰相白敏中以雄素為德裕識拔。猥曰。曩日之功。朝廷以蒲孟峽三鎮酬之。已多矣。乃除左神武統軍。雄失勢。快快疾而卒。十一月。牛僧孺與德裕自長慶後。以權勢相軋。互謀傾擠。對立朋黨。不能釋憾。而皆竄身瘴海。抑自貽也。德裕既遠竄。有人作詩二章。曰。蒿棘深春衛國門。九年於此盜乾坤。兩行密疏傾天下。一夜陰謀達至尊。肉視具僚亡匕箸。氣吞同列削寒溫。當時誰是承恩者。肯有餘波達鬼村。其二曰。勢欲凌雲威觸天。朝輕諸夏力排山。三年驥尾有人附。一日龍髯無路攀。畫閣不開梁燕去。朱門罷掃乳鴉還。千巖萬壑應惆悵。流水斜傾出武關。德裕當軸頗為寒素開路。凡有親戚在朝者。不得應舉。遠人皆相賀慶。或為詩曰。八百孤寒齊下淚。一時南望李崖州。搢紳好惡偏異如此。白居易年長於德裕。視德裕為晚進。方德裕任浙西觀察。

使。居場為蘇州刺史。德裕以使職自居。不少假借。居易不得已以軍禮見。故為詩曰。昨日新生黃雀兒。今朝飛上紫藤枝。搖頭擺腦花叢裏。將謂春光總屬伊。當塗不解栽桃李。滿地惟聞種蒺藜。萬里崖州君自去。如今惆悵怨他誰。樂天曾任蘇州日。要勒須交用禮儀。從此結成千萬恨。而今果中白家詩。然醉吟先生傳及實錄。皆謂居易會昌六年卒。而德裕敗於大中二年。或謂此詩為偽。德裕既敗。嘗為詩曰。十年紫殿掌洪鈞。出入三朝一品身。文帝寵深陪雉尾。武皇恩厚宴龍津。黑山永破和親虜。烏嶺全坑跋扈臣。自是功高臨盡處。禍來名滅不由人。大中三年春正月。德裕至崖州。即今瓊州也。郡北有亭。名曰望闕。德裕每登臨。未嘗不北望。悲淚有詩曰。獨上江亭望帝京。鳥飛猶是半年程。青山也恐人歸去。百匝千遭繞郡城。或謂德裕在崖州止。為此詩。餘皆仇家所作云。夏四月。宰相璿罷。為右僕射。以御史大夫崔鉉。兵部侍郎魏夫。並同平章事。戶部侍郎柳仲郢。與周璿善。他相不悅之。璿既罷。相。七月。乃以仲郢為秘書監。冬十月。以河陽節度使李珣為吏部尚書。閏十一月。崔鉉與崔珙故有怨。嘗劾珙貶嶺外。至是為鳳翔節度使。鉉復執政。珙懼以疾自乞。下除太子少師。分司東都。德裕處崖州。幽獨無與晤言。為窮愁志三卷。未

章為周秦行紀論云。言發于中。情見乎辭。則言志氣之來也。故察其言而知其內。既其辭而見其意。余嘗聞太牢氏。涼國李公。常呼牛僧孺曰太牢。涼云名不便。故不書。好奇怪其身。險易其行。以其姓應國家受命之讖。曰首尾三鱗六十年。兩角犢子自狂顛。龍蛇相鬪血成川。及見著玄怪錄。多造隱語。人不可解。其或能曉一二者。必附會焉。縱司馬取魏之漸。田常有齊之由。故自卑秩。至于宰相。而樹黨若山。不可動搖。欲有意擢撼者。皆遭誣生。莫不側目結舌。事具史官劉軻曰。昔余得太牢周秦行紀。反覆觀其太牢。以身與帝王妃后冥遇。欲證其身非人臣相也。將有意於狂顛。及至戲德宗為沈婆兒。以代宗皇后為沈婆。令人骨戰。可謂無禮於其君甚矣。懷異志於圖讖明矣。余少服臧文仲之言曰。見無禮於君者。如鷹鷂之逐鳥雀也。故貯太牢已久。前知政事。欲正刑書。力未勝而罷。余讀國史。見開元中御史汝南王子諒。彈奏牛仙客。以其姓符圖讖。雖似是而未合。三鱗六十之數耳。自裴晉國與今涼國名不便。彭原程趙郡紳諸從兄。嫉太牢如讎。頗類全志。非懷私忿。蓋惡其應讖也。太牢作鎮襄州日。判復州刺史樂坤賀武皇監國狀曰。閑事不足為賀。則恃姓敢如此耶。會余復知政事。將欲發覺。未有由。值會平昭義。得與劉從諫交結書。因竄逐之。嗟乎。為人臣

陰懷逆節。不獨人得誅之。鬼使誅之矣。凡與太牢膠固。未嘗不是浮薄無賴輩。以相表裏。意太牢有非望。而就佐命焉。斯亦信符命之致。或以中外罪余於太牢愛憎。故明此論。庶乎知余志乎。所恨未暇之。而余又罷。豈非王者不死乎。遺禍胎於國。亦余大罪也。儻同余志。繼而為政。宜為君除患。曆既有數。意非偶然。若不在當代。其必在於子孫。須以太牢少長咸真於法。則刑罰中。而社稷安。無患於二百四十年後。嘻。余致君之道。分隔於明時。嫉惡之心。敢事於早歲。因援毫以攄宿憤。亦書行紀之迹于後。僧孺為周秦行紀云。余真元中舉進士落第。歸苑葉間。至伊闕南道鳴皋山下。將宿大安民舍。會暮不至。更十餘里。一道甚異。夜月始出。忽聞有異香。因趨進。行不知狀。遠見火明。意為莊家。更前駭至一室。庭門若富家。有黃衣人曰。郎君何氏何至。余曰。僧孺姓牛。應進士落第。往大安民舍。誤道來此。黃衣人告。少時出曰。請郎君入拜殿下。簾下語曰。妾漢文帝母薄太后。此是妾廟。太后遣軸簾。使上殿。召坐。食頃。太后命高祖戚夫人。元帝王嬪。余皆拜。乃亦就坐。太后迎唐朝太真楊妃。齊潘妃。余拜。繼命進饌。太后問曰。今天子誰。余對曰。今皇帝名迨。代宗長子。太后曰。沈婆兒作天子也。大奇。命酒各賦詩。余應教作詩曰。香風引上大羅天。月地花宮拜洞仙。共道人間

凋悵事。不知今日是何年。太后曰。秀才遠來。今夕誰伴。戚夫人先起辭曰。如意成長。潘妃曰。東昏侯誓不負他。綠珠曰。石衛尉嚴忌。太后曰。太夏今朝先帝貴妃。重言其他。太后曰。王昭君。昭君不對。低眉羞恨。俄歸休。余為左右送入昭君院。會將旦。侍人告起。太后戚夫人昭君等皆泣別。使朱永人送至大安民里。余衣上香經十餘年不歇云。或謂牛奇章初與衛公相善。常因會餞。僧孺戲曰。綺紵于何預斯坐。衛公因銜之。自後衛公再居相位。僧孺卒遭譴逐。世傳周泰行紀。非僧孺作。德裕門人韋華所撰。開成中曾為憲司所覈。文宗覽之。笑曰。此必假名。僧孺是貞元中進士。豈敢呼德宗為沈婆兒。其事遂寢。皇甫弘績牛羊日曆曰。太宰既交惡黨。潛豫姦謀。太宰乃元和中青衫外郎耳。穆宗世因承和薦。不二三年位兼將相。憲宗仙駕至灊上。以從官召知制誥。當時宰相未盡兼職。而獨綜集賢史館。兩司出鎮未盡佩相印。而太宰同平章事出夏口。夏口去節十五年。由太宰而加節焉。太宰早孤。母周氏治蕩無檢。鄉里兄弟羞赧。乃令改醮。既與前夫義絕矣。及貴。請以出母進贈。禮云。庶氏之母死。何為哭於孔氏之廟乎。又曰。不為伋也。妻者。則不為白也。母而李清心妻配牛幼簡。夏侯銘所謂魂而有知。前夫不納於幽壤。歿而可作。後夫必訴於玄穹。使其母失行。

無適從之鬼。上罔聖朝。下欺先父。得曰忠孝智識者乎。姚勉。開元相元崇曾孫也。李逢吉知舉。第進士。累遷諫議大夫。更湖常二州刺史。與德裕厚善。德裕為令狐綯等譖逐。摘索友黨。無敢通勞問。既居海上。家無資。病無湯劑。最數饋餉候問。不傳時焉。厚薄。閏十一月。德裕卒於崖州。初德裕為并州從事。到未旬月。有王山人者請謁。公問所能。曰善於安寘。公初未之奇。因請虛正寢。備几案紙筆香水而已。仍前垂簾。生與公簾外靜伺之。俄頃生曰。可驗矣。視之紙上有八字甚大。且有楷注曰。位極人臣。壽六十四。生遽請歸。不知其所。及會昌中。果位一品。卒于海南六十四云。初德裕分司東都。聞有僧善知人禍福。召問之。曰。公突未已。當南行萬里。德裕甚不樂。明日復召之。僧且曰。慮言之未審。請結壇三日。又曰。公南行之期定矣。德裕曰。師言以何為驗。僧即指其地。此下有石函。即命之果得焉。然啓之無所觀。德裕重之。且問南行還乎。曰。公食羊萬口。有五百未滿。必當還矣。德裕嘆曰。師實至人。我於元和中為北都從事。嘗夢行至晉山。盡目皆羊。有牧者數十。謂我曰。此侍御食羊也。常記此夢不泄於人。今知冥數固不誣矣。後旬餘。靈武師達米墜饋羊五百。大驚。召僧告其事。且欲還之。僧曰。羊至此矣。為相國有矣。還之無益。南行其不返乎。果如其言。大中五

年崔鉉輔政欲專任。患白敏中居右會黨項數寇邊。鉉建言宜遣大臣鎮撫。上嚮其言。三月乃以敏中為招討都統制置使。冬十月以戶部侍郎魏謩同平章事。謩延英謝曰。宰相之任自古所難。臣無夔契之才。而叨夔契之任。未知何以佐陛下。今兵事休息。天下寧靖。所切者在建儲貳以為國之本。帝臨御累年。嫡嗣未辯。中外不敢建言。及謩為相。率先啓發。物議重之。大中六年三月。詔象州立山縣尉李燁。護其父德裕喪歸葬東都。從令孤絢之請也。德裕既沒。一夕見夢。絢曰。某已謝明時。公幸哀我。使得歸葬。絢語其子瀉。瀉曰。衛公犯衆怒。又崔魏皆仇敵。言之可乎。既夕又夢如前。懼曰。衛公精爽尚可畏。不言禍將及。入中書且為同列言之。遂請于帝。夏五月。淮南節度使李珣卒。大中七年秋七月。初京兆府叅軍盧甚為京尹遣巡館驛。左補闕崔暄赴婚。回與甚郵亭相值。爭廳。甚以官雖卑。乃公行。略不避暄。遂相抵訶。甚下御史按問。吏曰。當服白衫。甚曰。非國郵。不素服。又與宰相書。以己比孟軻。而方暄錢鳳。瑄黨與衆。皆為盡力。帝以甚言涉不恭。而宰相崔鉉力庇暄。遂誣奏甚。除籍徙嶺南。行至洛源驛。賜自盡。暄止。左遷太常卿。至是。貶陽翟令。十一月。以權知刑部侍郎鄭魯為河南尹。崔鉉為相。魯與楊紹復。段壞。薛蒙。為鉉取信。凡擇官議事。與之叅酌。時人

語曰。炙手可熱。楊鄭段薛。欲得命通魯。紹壞蒙。帝聞之。題于床。鉉欲引魯為相。而忽除河南尹也。一日帝語鉉曰。魯去矣。除改還自由否。鉉惶恐稱謝。大中八年春正月。上以甘露之變。惟李訓鄭注挾邪當死。自王涯賈餗等無罪。詔皆雪其寃。九年。淮南饑。民多流亡。節度使杜悰荒於遊宴。政事不治。上聞之。即以宰相崔鉉同平章事。充淮南節度使。悰為太子太傅。分司。召河東節度使盧鈞為左僕射。鈞宿齒數外遷。而後來多至宰相。始被召。自以當輔政。既失志。故內怨望。數移病不事事。遂遊林墅。累日一還。令孤絢惡之。罷僕射。以檢校司空守太子太師。後帝元日大饗。舍元殿。鈞年八十。升降如儀。音吐鴻暢。舉朝咨歎。以鈞耆碩長者。顧不任職。咎絢為媚賢。絢聞言于帝。即以鈞同平章事。山南西道節度使。俄為東都留守。大中九年十一月。以吏部侍郎柳仲郢為兵部尚書。充諸道鹽鐵轉運等使。時德裕既貶死。家無祿。不自振。仲郢德裕厚善。乃取其兄子從質為推官。知蘇州。令孤絢持不可。乃移書開諭。絢悟。從之。大中十年六月。吏部尚書李景讓。初與蘇滌裴夷直善。二人皆為李宗閔楊嗣復所擢。故景讓在會昌時。柳厭不遷。上既銜穆宗舊怨。至是。景讓上言。穆宗乃陛下兄。敬文武三宗。乃兄之子。陛下拜兄尚可。拜姪可乎。是使陛下不得親事七

廟宜遷四主。還代宗以下主。復入廟。以正昭穆。事下百官議不決而止。景讓始以方毅稱。由是德望稍衰。大中十一年二月。以門下侍郎同平章事。魏謩同平章事。充西川節度使。謩。鄭公後也。為相。議事上前。它相或委曲規諷。謩正言無所避。上每歎曰。謩。綽有祖風。我心重之。然竟以剛直為令狐綯所忌。出之。大中十二年。宰相令狐綯擬李遠杭州刺史。上曰。吾聞遠詩云。長日惟消一局碁。安能理人。綯曰。詩人託此為高興耳。未必實然。上曰。且令往試觀之。上詔刺史毋得外徙。必令至京師。而察其能否。然後除之。令狐綯嘗徙其故人為鄰州刺史。便道之官。上見其謝上表。以問綯。對曰。以其道近。省送迎耳。上曰。朕以刺史多非其人。為百姓害。故欲一見之。訪問其所施設。知其優劣。以行黜陟。而詔命既行。直廢格不用。宰相可畏有權。時方寒。綯汗透重裘。初李商隱擢進士第。綯獎舉甚力。王茂元鎮河陽。愛其才。表掌書記。茂元善李德裕。而牛李黨人。嗤商隱以為詭薄無行。共排笮之。茂元死。來游京師。久不調。更依桂管觀察使鄭亞。府為判官。亞謫循州。商隱從之。三年乃歸。亞亦德裕所善。綯以忘家循恩。致利苟合。謝不通。久之復干綯。補太學博士。大中十三年八月。宣宗崩。懿宗即位。始畢誠被知於宣宗。嘗許以相。令狐綯忌之。自邠寧徙昭義。河東凡

三鎮不得還。誠思以有結。綯至大原。求麗姝盛飾使獻。綯曰。太原於我無分。今以是餌。將破吾族矣。不受。使者留于邸。誠亦放之。太醫李玄伯者。帝所喜。以錢七十萬聘之。夫婦日自進食。得其歡心。乃進之帝。嬖幸冠後宮。玄伯又治丹劑以進。帝餌之。疽生於背。以終。令狐綯執政歲久。忌勝已者。中外側目。其子瀉。頗招權受賄。人號曰白衣宰相。至是言事者競攻其短。十二月。乃以綯充河中節度使。以前荆南節度使同平章事白敏中。同平章事。初鄭畋父亞為李德裕所推引。白敏中令狐綯繼當國。皆怨李德裕。其賓客並廢斥。故畋不調。幾十年。外更帥鎮幕府。至是綯去位。始為虞部員外郎。唐語林。宣宗在藩邸時。為武宗所薄。將中害者非一。一日宣召打毬。欲圖之。中官奏瘡痍遍體。腥穢不可近。上命卑置殿下。果如所奏。遂釋之。武宗常夢為虎所逐。命京兆同華格虎以進。至宣宗即位。本命在寅。於屬為虎。中朝故事。宣宗即憲皇少子也。皇昆即穆宗也。穆宗敬宗之後。文宗武宗相次即位。宣皇皆叔父也。武宗初登極。深忌馬。一日會鞠於禁苑間。武宗召上。遙觀。瞬目於中官仇士良。躍馬向前曰。適有旨。王可下馬。士良命中官輿出軍中。奏曰。落馬已不救矣。尋請為僧。遊行江表間。會昌末。中人請還京。遂即位。習學記言。舊史稱宣宗。帝道皇猷。始終無缺。雖漢之

文景亦不能過也。惜乎簡籍遺落十無三四。吮墨揮翰有所慊然。而新史謂其以察為明。無復仁恩之意。蓋自是之後。唐遂衰亡。不復能振故也。然舊史言寶曆已采。中人擅權。事多假借。京師豪右。大擾窮民。洎大中臨馭。一之日權豪歛迹。二之日奸臣畏法。三之日閹寺讐氣。由是刑政不濫。賢能効用。百揆四岳。穆若清風。十餘年間。頌聲載路。然則新舊史相去百餘年。舊史所褒者皆實美。而新史所貶者乃虛意也。若謂唐自此衰。以為宣宗之過。則又不然。宣王之後。有幽王。十餘年周遽亡。豈必以此咎宣王乎。夫方鎮宦官。為唐必壞之疾。至是既不可為。則為人主者。能歛衽恭己。精於聽察。使小權小政。不至甚撓。不貽民害。以了目前。若是而已。新史以大者責之。論則善矣。余亦未知其所處也。宣宗郭后事。新史記其為宣宗不禮。欲自殞。是夕暴崩。及貶禮官王皞。白敏中。周墀。皆詰怒甚詳。而舊史乃言宣宗即后之諸子。恩禮愈異於前朝。無一語類新史。豈唐故史。文所諱。遂承用之耶。晁無咎濟北集。宣宗講盤游之實。車駕將幸華清宮。兩省進狀論奏。詔曰。朕以驪山近宮。真聖廟貌。未嘗修謁。云云。蓋崇禮敬之心。非以般遊為事。已允來請。華清之幸。聽諫而輟。亦足善也。諱般游之實。託禮敬之名。詔令人主所以信四海也。自文非矣。若出一時代言者之口。非諛

則欺。孫甫唐史記論十三年八月壬辰。帝崩于大明宮。以鄆王溫為太子。帝初鍾愛愛王滋。又以鄆居長。故久不立儲貳。嘗召宰相裴休謂曰。有何貯畫。休素蓄立儲之意。乃頓首以諫。帝曰。若立太子。便是閑人。休不敢盡言。及大漸。內樞密院王龜長輩方患之。矯詔出宗實為淮南監軍使。宗實悟。且至寢殿。帝已崩。叱左右責以矯詔。皆捧足乞命。遣宣徽北院使齊元簡迎鄆王於藩邸。論曰。宣宗久居藩邸。頗知時事。故在位十三年。尚儉德。以恤人隱。謹法令。以肅臣下。恩厚宗室。禮重宰相。至微行以察取士得失。焚香以讀大臣章疏。誠好德之君矣。然知為人君之小節。而不知其大體。懿安太后。嫡母也。不能盡禮事之。反致暴崩。為世所駭。李德裕有濟時之才。不能容而逐之。令狐綯功德無間。復容子納賄。有秦時政。至懿宗朝。諫臣疏綯之罪。曰。大中威福。又欲行於今日。則當時事可知也。其河湟歸順。夷夏粗安。乃承武宗用德裕之後。威令已盛。而然爾。不然。宣宗用敏中輩。於時何所經畫哉。至寵次子。不定儲位。裴休奏請。帝曰。若立太子。便是閑人。此尤昧人君大體也。卒至內臣爭立嗣君。幾至於亂。是宣宗區區為善。止於小節耳。

永樂大典卷之七千一百五



重錄總校官侍郎臣高拱

學士臣陳以勤

分校官諭德臣張居正

寫書官序班臣吳繼芬

圖點監生臣蘇泰

臣陳于廷